

Sarajevo, 18.03.2025. godine

Broj: 06-06-2-296-2/25

## **Poziv na online obuku za mentore i organizatore praktične nastave iz kompanija koje realiziraju praktičnu nastavu za učenike srednjih škola**

Vanjskotrgovinska/Spoljnotrgovinska komora Bosne i Hercegovine, kao partner i državna koordinacijska tačka (NCP) za poslodavce/kompanije iz Bosne i Hercegovine na implementaciji regionalnog projekta „Unapređenje kvaliteta obrazovanja i obuke u Jugoistočnoj Evropi – EQET SEE”, **poziva mentore i organizatore praktične nastave iz kompanija** koje su aktivne u sektoru metala/metaloprerade i poljoprivrede/prehrane, na online obuku, koja će se održati preko Zoom aplikacije, u petak, **21. marta 2025. godine, s početkom u 10.30 sati**.

Predviđeno vrijeme trajanja online obuke je 1 sat i 30 minuta.

U uvodnom dijelu online obuke biće prezentiran projekat „Unapređenje kvaliteta obrazovanja i obuke u Jugoistočnoj Evropi – EQET SEE” i ostvareni rezultati: razvijeni regionalni standardi zanimanja i standardi kvalifikacija, kao i materijali za podučavanje, učenje i smjernice za realizaciju učenja zasnovanog na radu (WBL) za zanimanja – bravar i poljoprivredni tehničar tradicionalnog i organskog porijekla. Prije prelaska na stručni dio obuke, učenici će biti upoznati sa načinom pristupa video obukama na temu „Društvena održivost i rodna ravnopravnost“ i „Održivost životne sredine“, te preuzimanju stručnih publikacija, razvijenih kroz EQET SEE projekat, sa platforme za elektronsko učenje VTK/STK BiH: <https://elearning.komorabih.ba/>

### **Ciljevi online obuke su:**

- ◆ unaprijeđenje znanja i vještina mentora i organizatora praktične nastave u pogledu njihovog razumijevanja didaktičkih metoda, procesa učenja kroz rad i uloge nastavnika/instruktoru za praktičnu obuku (iz škole) i mentora praktične nastave (iz kompanije),
- ◆ identifikacija inovativnih pristupa, principa i metoda u realizaciji praktične nastave učenika,
- ◆ identifikacija procjene i dokumentovanje procesa učenja kroz rad,
- ◆ razumijevanje potrebe za pedagoškim pristupom u praktičnoj obuci,
- ◆ razumijevanje procesa planiranja i realizacije praktične nastave učenika,
- ◆ identifikacija principa na kojima se zasniva proces i potrebni resursi,
- ◆ razumijevanje metoda, načina rada, praćenje i vrednovanje napredovanja učenika u sticanju potrebnih veština.

### **Ko je predavač na online obuci?**

Predavač na online obuci je g. Nebojša Gračanin, voditelj odjeljenja za strateške projekte i edukaciju u kompaniji Kolektor CCL d.o.o. iz Laktaša. Certificirani je trener kroz EQET SEE projekat i stručnjak sa dugogodišnjim iskustvom u radu sa učenicima srednjih stručnih i tehničkih škola. Kao ekspert na projektu EQET SEE dao je značajan doprinos realizaciji projektnih aktivnosti.

### **Kome je online obuka namijenjena?**

- ◆ Uposlenicima kompanija iz sektora metala/metalooperade i poljoprivrede/prehrane, koji su već certificirani kao mentori, od strane privrednih komora na nivou kantona (u FBiH), entiteta (RS) ili Brčko Distrikta BiH.
- ◆ Uposlenicima kompanija iz sektora metala/metalooperade i poljoprivrede/prehrane, koji nisu formalno prošli obuku za mentore praktične nastave, ali se žele upoznati sa konceptom učenja zasnovanog na radu (WBL) ili proširiti svoje znanje u pogledu organizacije praktične nastave za učenike srednjih stručnih/tehničkih škola.

**Napomena:** Nije obavezno da kompanija u tekućoj školskoj 2024/2025. godini izvodi praktičnu nastavu za učenike srednjih stručnih ili tehničkih škola. Dovoljan kriterij je da kompanija zapošljava certificirane mentore ili osobe koje su zadužene da vode/prate učenike na praksi.

### **Kako i do kada se prijaviti?**

Za učešće na online obuci potrebno je popuniti [online prijavni obrazac](#), najkasnije do petka, 21. marta 2025. godine do 09.00 sati. Svim kandidatima, koji ispunjavaju uslove, biće dostavljena potvrda prijema prijave i Zoom link za pristup online obuci, najranije 24 sata prije održavanja online obuke.

### **Kako pristupiti online obuci?**

Online obuka će biti održana putem Zoom aplikacije, koju možete besplatno preuzeti na sljedećem link-u: <https://zoom.us/download> (verzija za desktop/laptop računare). Za korisnike mobilnih telefona i tableta dostupna je Zoom aplikacija za mobilne uređaje na App Store-u i Google Play Store-u. Preporučujemo da pristupite preko uređaja sa stabilnom internet konekcijom, te da koristite kameru i/ili slušalice sa mikrofonom.

### **Ko je kontakt osoba za više informacija?**

Kontakt osoba za sve dodatne informacije je Mirza Konjo, saradnik za edukaciju u Institutu za edukaciju VTK/STK BiH i zamjenski član državne koordinacijske tačke (NCP) na projektu EQET SEE. Telefon: +387 33 566 204 & E-mail: [mirza.konjo@komorabih.ba](mailto:mirza.konjo@komorabih.ba)

## **Više informacija o projektu „Unapređenje kvaliteta obrazovanja i obuke u Jugoistočnoj Evropi – EQET SEE”**

EQET SEE projekat ima za cilj doprinijeti smanjenju nezaposlenosti mladih u Jugoistočnoj Evropi podupiranjem razvoja društveno uključivog i visokokvalitetnog obrazovanja usmjerenog na tržište rada u Albaniji, Bosni i Hercegovini, Kosovu, Moldaviji, Crnoj Gori, Sjevernoj Makedoniji i Srbiji. Fokus projekta je na unapređenju relevantnosti stručnog obrazovanja u skladu s potrebama tržišta rada, kao i na poboljšanju osiguravanja kvaliteta u predtercijarnom obrazovanju. EQET SEE je nastavak projekta „Ka regionalnim standardima zanimanja – TO REGOS“.

VET komponenta projekta imala je sljedeće ciljeve:

### **1. Poboljšani nastavni planovi i programi koji integriraju elemente učenja zasnovanog na radu i zasnovani su na regionalno dogovorenim standardima zanimanja i standardima kvalifikacija, oslanjajući se na vještine relevantne na tržištu rada i ishode učenja kroz:**

- ◆ Poboljšanje suradnje između poslovnog i obrazovnog sektora u stručnom obrazovanju i obuci na regionalnom i državnom nivou,
- ◆ Razvoj i usvajanje regionalno utemeljenih standarda zanimanja orijentiranih na tržište rada,
- ◆ Razvoj i usvajanje regionalno utemeljenih, pravednih, uključivih i održivih standarda kvalifikacija s ishodima učenja relevantnim za tržište rada,
- ◆ Razvoj i usvajanje nastavnih planova i programa koji uključuju učenje zasnovano na radu (WBL), jednakost i relevantne stavove o održivosti.

### **2. Unaprijeđene kompetencije nastavnika, instruktora i mentora u kompanijama za provedbu nastavnih planova i programa koji integriraju elemente učenja zasnovanog na radu kroz:**

- ◆ Razvijanje materijala za podučavanje i učenje,
- ◆ Izradu regionalnih smjernica za implementaciju WBL komponenti u nastavne planove i programe,
- ◆ Razvijanje preporuka za osiguranje kvalitete za provedbu nastavnih planova i programa s elementima jednakosti i održivosti učenja zasnovanog na radu,
- ◆ Razvijanje i implementaciju modula obuke za trenere za nastavnike, mentore u kompanijama i školske koordinate.

Projekat EQET SEE finansira Austrijska razvojna agencija (ADA) kroz Austrijsku razvojnu suradnju (ADC), a implementira ga i sufinansira Inicijativa za reformu obrazovanja Jugoistočne Evrope (ERI SEE). Za više informacija o projektu posjetite: <https://eqet.erisee.org/>